

Kalaallit Nunaannut aammalu Kalaallit Nunaanniit timmisartuussinerni imermik Kalaallit Nunaanni imeqarneqartumik sassaalliteqartoqartalernissaa sulissutigineqassasoq, ilanngullugu attuumassuteqartunik suleqateqarnikkut soorlu timmisartuutileqatigiiffiit aammalu Visit Greenland Naalakkersuisut peqquneqarnissaannik Inatsisartut aalajangiiffigisassaattut siunnersuut. (Inatsisartuni ilaasortaq Lars Poulsen, Siumut)

Siullermeerneqarnera

Siulittaasoq qujanaq.

Aamma siunnersuuteqartumut, Lars Poulsen, Siumut, siunnersuuternut qujanaq.

Siunnersuutip una siunertaa anguniagaalu pitsaasuupput. Siunertaa anguniagaalu Naleqqamiit akerlerinngilagut.

Taamaakkaluartoq eqqumaffigisassat arlaliupput ajortumut sangunissaa pinaveersaassagutsigu.

Siunnersuutip siunertaa ajunngikkaluartoq ilusilersornera amigaateqangaatsiarpoq suliareqqissaagaarpasinnanilu.

Politikkikkut suligaangatta mianerisassarput eqqumaffigisassarpullu tassaagami takoqqusaaginnarluni politikkerneq sunniteqartussaanngitsoq.

Qulequtaa siunertaalu kusanarput kisianni ingerlatsineq, akit, suliariumannittussarsiuussineq (udbud), eqqagassat, pilersuinikkut isumannaatsuunneq il.il. eqqaaneqanngiivitsut maluginiarparput.

Nunatsinniit tunisassiat naleqarnerulernissaat, ineriartortinnissaat, nittarsaanneqarnissaat atornerulernissaallu tapersorsorpagut. Soorunami.

Eqqaamaannartariaqarparput Inatsisartut paasissutissat pingaaruteqartut pisariaqartippai siunnersuutit akuerineqassappata. Siunnersuutip kingunerisassai aaqqitassanut, aningaasanut, avatangiisitsinnut tunngasunut pisariaqartippagut.

Erseqqissarusuppara siunnersuut una pingaaruteqartumik tikkuussimmat – imerlu pillugu kisiat pineqarani.

Siammasinnerusumik imaqarpoq.

Tassami Kalaallit Nunaat nunarsuarmi imeqarfinnik minguinneqanik peqarpoq.



Nunatta ernga ilisarnaataavoq.

Nunatta ernga pinngortitarsuup minguinneranik ilisarnaataavoq.

Nunatta ernga piujuartitsinermik ilisarnaataavoq.

Aamma pinngortitamut qanittumik inuuneqarnermik ilisarnaataavoq.

Taanna oqaluttuaq nunarsuarmi naleqarluarpoq – kisianni sulit tamakkiisumik atorluarneqanngilaq.

Taamaattumik pissusissamisuginnarpoq eqqarsaatigissallugu qanoq iliorluta kalaallit tunisassiaat pitsaanerumik saqqummiussinnaanerigut – ilaatigut angalanermi pingaarnerpaami, tassa timmisartuussinermi.

Taamaammat siunnersuut nukittoquteqarpoq.

Isumassarsiaq annikippasissinnaasoq - kisianni annertunerumik isigineqarsinnaasoq.

Timmisartorneq tassaavoq, amerlanerit eqqarsaatigalugit, Kalaallit Nunaannut isertarfik aammalu nunatsinniit anisarfik.

Nunatsinnut tikeraartartut takornariallu misigisaat tassani aallartinneqarlutillu naammassineqartarput.

Tassani kalaallit tunisassiaannik saqqummiussinnaagutta, taava nammineq oqaluttuarput tikeraartunut siusinnerusukkat oqaluttuarisinnaavarput - pitsaanerumillu naggaserlugu.

Tamanna imminermini naleqarpoq.

Visit Greenland nammineq aamma takornariartitsisunut kaammattuipput sapinngisartik tamaat imeq tunisassiallu nunatsinningaanersut atortassagai imaluunniit tunisassagai.

Siunnersuummi imermik Kalaallit Nunaanni imeqarneqartumik

sassaalliteqartoqartalernissaa sulissutigineqassasoq siunnersuutigineqarpoq.

Kisianni nassuiarneqanngilaq kikkut tuniniaassasut, angallaviit tamarmik pineqarnersut,

timmisartuutileqatigiiffiit tamarmik imaluunniit Air Greenland kisiat pineqarnersut. Aamma

nassuiarneqanngilaq angalasut tamarmik pineqarnersut, imip pitsaassusaa,

allagartaqarnissamut piumasaqaatit aammalu pilersuinikkut isumannaatsuunneq.

Politikkikkut tamakkua akuleruffigilissagutsigit taava suliareqqissaartariaqarpagut.

Taamaangippat politikikkut aalajangiinerit sunniutaasa pitsaaqutai pitsaanngequtaalu nalunassapput.



Naleqqamiit siunnersuutit imaattut tapersorsinnaavagut - kisianni aatsaat suliareqqissaarneqarsimagunik.

Imip pitsaassusia qulakkeerneqartariaqarpoq. Kinaassuserput atorluarnissaa eqqumaffigisariaqarparput.

Tunisassiaq oqaluttuamut naapertuuttariaqarpoq. Imeq kisiat pineqannginnami. Nunatta ilisarnaatai uani aamma ilaagamik.

Aamma Kalaallit Nunaanni aallaaveqarneq qulakkeerneqartariaqarpoq.

Tunisassiorneq, ineriartortitsineq periarfissallu Kalaallit Nunaanni aallaaveqartariaqarput.

Aamma Kalaallit aallavigineqartariaqarput.

Kalaaleqateqarpugut nunatta ernganik sermianilu avammut tuniniaasartut, nunanut kiattunut ilanngullugit.

Periarfissat atorluarpaat. Kalaaleqatigut aallartisaasut tapersorsorneruniartigit. Nunatsinni inuussutissarsiornikkut ineriartortitseqataasut torrallatamik aallartisaanikuullutik tamatsinnullu tamanna iluaqutissaqarluni.

Maligassiuisoqarpugut taamaattunik kalaaleqatitta akornanni.

Taamaamat ingerlalluarnissaat qulakkeerniarlugu tapersersueqataasariaqarpugut.

Tamannalu Siumup siunnersuutaata pitsaasumik aallartiffiulersinnaavaa.

Uani taasariaqarpara Naalakkersuisut akissuteqaataani ilisimatitsissutigigaat nalunaaqutsersueriaaseq "Product of Greenland", qaammammi uani tusarnutigissallugu suliarineqartoq. Tassuungalugu atatillugu soqutiginarpoq qanoq "Product of Greenland" paasisaasnersoq. Piumasaqaateqassava kalaallit piginnittuussasut imaluunniit ingerlatsiviinni kalaallit sulisuussasut?

Imaluunniit aamma takulissavarput danskit piginnittuusuisa tunisassiaai aamma taaneqartalissasut "Product of Greenland"? Piumasaqaatit suussappat?

Tamanna pingaaruteqarpoq paasissallugu.

Siunnersuut aningaasatigut annertuumik kinguneqartussaangitsutut nalilerneqarpoq.

Kisianni uppernarsaatiniq amigarpoq. Akip, poortornerup, toqqorsiveqarnerup, assartornerup, oqimaassutsip, cateringimik ingerlatsinerup imaluunniit ingerlatsisut aningaasartuutaanerusinnaasut pillugit siunnersuummi uppernarsaatiniq peqanngilaq.

Aningaasatigut annertuumik kinguneqartussaanginnermik naliliinermik oqaatigigaanni taava takutinneqartariaqarpoq qanoq nalilersuisimanerluni.

Aamma una tunngaviunerusumik eqqarsaatigisassaq nalilersugassarlu tassaavoq: Inatsisartut imeruagassat timmisartuussinerni sorleqqissaat sassaalliutigineqassasut akuleruffigisalerniarpaat?

Tassami inuussutissarsiornermut politikkit taavalu menu-mi suut toqqagassaanersut pillugit politikki assigiinngitsorujussuugamik. Sinaakkusiilluta aqutsisussaavugut immikkuualuttunik aqutsisussaanngilagut, tassa detailstyring aqqutigalugu aqutsinata.

Visit Greenland aamma siunnersuummi ilanngunneqarnera amigarteqalaarpoq. Visit Greenland suut suliarissanerai nassuiarneqanngilaq. Ilisarnaasioq, tuniniaanissamik nittarsaassisarneq imaluunniit ataqatigiissaarineq. Pisortatiguupajaajusattumik pisiortuisartutut inissinneqannginnissaa pingaaruteqarpoq, taakkummi aalajangersimasumik suliaqareeramik. Taamaammat tamanna erseqqissarneqarnissaa pingaaruteqarpoq.

Siunnersuut tunngaviusumik tapersorsorparput tunisassiat nunatsinninngaannersut iluaqusernissai takornialerinikkullu naleqarnerulersitsinissaq pingaartikkatsigit. Taamaakkaluartorli siunnersuut suliareqqissaaqaarnissaa amigaataasutut isigaarput. Aningaasaqarnikkut, pilersuinerup qulakkeerneqarnissaa, avatangiisit, poortuisarneq, unammilleqatigiinnerlu pillugit erseqqissumik nassuiaasoqartariaqarpoq.

Taamaattumik siunnersuut ersarissarneqartariaqarpoq.

Imaluunniit siunnersuut allanngortinneqarnissaa pitsaanerusinnaavoq. Taamaammat allannguutissatut siunnersuuteqarusuppunga:

“Kalaallit Nunaannut aammalu Kalaallit Nunaanniit timmisartuussinerni imermik Kalaallit Nunaanni imeqarneqartumik sassaalliuteqartoqartalernissaannut Naalakkersuisut iliuusissanik pilersaarusiornissamut peqquneqarnissaannik Inatsisartut aalajangiiffigisassaattut siunnersuut “

Tassanilu pilersaarusiornermi aningaasaqarnikkut, ingerlatsinikkut, avatangiisinullu tunngatillugu aammalu unammilleqatigiinnermut inatsisit naapertorlugit naleqquttumik pinissaa qulakkeerneqassaaq.

Taavalu pilersaarummi aamma uku minnerpaamik ilanngunneqassapput:

- pilersuinerup isumannaatsuunissaa
- poortuutit aamma eqqagassalerineq qanoq isumagineqassanersut
- pilersuisunut atugassarititaasut ammasut aamma naapertuuttut
- aningaasartuutit amerlariarsinnaaneri

- Kiisalu ataasiakkaanut immikkut iluaqutaasumik ersinngitsumik iluaqutissiisoqannginnissaa, tassa aalajangersimasumik ersarissumillu periuseqartoqartariaqartoq.

Siunnersuummi siunertaq tapersorsorparput.

Kalaallit tunisassiaasa takussaanerulernissaat siuariartornissaallu tapersorsorsigit.

Taamatut oqaaseqarluta Inuussutissarsiornermut Aatsitassanullu Ataatsimiititaliamut ingerlateqqinnissaannut innersuussuteqarpugut siunnersuullu sukumiisumik suliareqqinneqarnissaa qilanaaraarput.

Qujanaq.